

Newspaper	Harakah
Date	9/3/2012

Dr Mahathir bermain api agama

Harakah - 9/3/2012
SAYA ingin mengulas mengenai video terbaru yang sedang tersebar di laman sosial yang memaparkan pandangan Tun Dr Mahathir berkaitan hukum Hudud. Kenyataan yang jelas keluar daripada mulut Mahathir adalah "Hukum Hudud adalah rekaan Ahli Fiqah, dan bukannya datang daripada al-Quran." Kenyataan ini sangat berat dan saya kira ramai ahli agama memandang kenyataan ini boleh memesonkan akidah. Tidak ubah seperti dakwaan sesetengah orientalis yang mengatakan Fardu Haji dicipta oleh kerajaan Saudi untuk menarik pelancong.

Pertama, Mahathir perlu buka kembali al-Quran dan merujuk ulama. Bukankah Umno sudah ada sekretariat Ulama Muda untuk dirujuk. Antara ayat dalam al-Quran yang jelas menerangkan tentang Hudud adalah Surah Al-Maidah ayat 38. "Dan orang lelaki yang mencuri dan orang perempuan yang mencuri maka (hukumnya) potonglah tangan mereka sebagai satu balasan dengan sebab apa yang mereka telah usahakan, (juga sebagai) suatu hukuman pencegah dari Allah. Dan (ingatlah) Allah Maha Kuasa, lagi Maha Bijaksana." Dan ada berapa banyak lagi hadis yang berkaitan undang-undang ini.

Kedua, Mahathir tidak peka dengan sensitiviti umat Islam.

Pandangan masyarakat Malaysia terhadap Hudud kini sudah berubah. Kalau dulu mungkin ramai yang sependapat dengan Tun, tapi rata-rata orang sekarang mula menyedari Hudud ini adalah peraturan daripada Allah sehinggakan Najib sendiri mengiktirafnya walaupun tidak bersedia melaksanakannya kononnya menggunakan kaedah Maqasid Syariah. Jika tindakan meletak kepala babi di masjid dianggap mencabul sensitiviti agama, maka apatah lagi ucapan begini yang jelas menidakkan kata Allah dalam al-Quran.

Ketiga, di saat Mahathir sering dijemput untuk bercakap tentang Islamofobia di kalangan masyarakat barat, rupa-rupanya Tun sendiri yang menghidap Islamofobia. Masyarakat barat yang tidak mendapat maklumat sebenar sering kali menuduh Islam agama keganasan, maka apa bezanya dengan Dr Mahathir yang cetek iln agama lantas menuduh peraturan potong tangan pencuri adalah tidak adil. Hukum agama tidak boleh hanya dinilai dengan logik akal.

Nasihat terakhir kepada Mahathir, tolong diam, berhentilah daripada memfitnah hukum Allah

**ISKANDAR KAMARUL AMIN
UIAM**